

A SIRINATA CA SAMPUGNA

(Finale 07/2004)

Mi osi fari, gnuornu, na sampugna
spaccannu u ruppu rì n filu r'aina.
...Forsi è a vota-bbona ca si ncugna
dipenni ru ştrummentu, si mi sona...!?

Pienzo o juornu cà mi retti a coffa
e mentrì mi fici vèriri a rintera
mi rissi “No.!” e pigghià na sboffa
ca parsi ca sbattì nta cantunera.

Gnuornu mi pigghiai ri curaggiu,
pallai cu me paisi nna ddu chianu,
picchè è bieddu assai nto misi i maggiu
e lu priai cu lu cori mmanu.

Rammi na manu tu, Mistretta mia,
falla ncantari cu li to biđdizzi
e forsi si apri u cori grazzâ-ttia
s'addumi, chi lumaredđi, i vaniđduzzi

M'abbinturai sutta a so fineştra
nta n'agnuniđdu all'ummira ra ştrata,
sunai forti ca parìa n'occheştra,
ma mi niscù na vuci scancarata.

Nun sacciu si fu cchissu o n'otra cosa
nu-mmi parsi cà mi fici ranni festa
e u puostu rî-ttarimi na rosa,
mi sdivacau n catu r'acqua n testa.

Lucio Vranca